

10.
ORDINIS MEDICI IENENSIS DECANVS
IVSTVS CHRISTIANVS LODER, D.

SOLEMNIA INAUGVRALIA

DOCTISSIMORVM MEDICINAE CANDIDATORVM

IACOBI LVDOVICI GEBHARDT,

WETTERAVIENSIS

ET

GEORGII FRIDERICI CHRISTIANI
F V C H S

IENENSIS

I N D I C I T.

Praemittitur commentationis *de vaginae uteri procidentia*,

particula I.

I E N A E

LITTERIS FICKELSCHERRIANIS.





Vaginae vteri relaxationem eiusque prolapsum, tum in virginibus, tum in feminis quae cum viro commercium habuerunt, tum quoque in grauidis et puerperis non raro obseruari, iis inprimis, qui artem obstetriciam ipsi exercent, cognitum est; videtur tamen hic morbus in obstetriciorum scriptorum libris non ita expeditus esse, vt superflua sit succincta eius historia obseruationibus superstructa.

Est autem vaginae structura ea, vt praeter vasa et nervica filamenta numerosa, quae ipsi insunt, praecipue ex tela



cellulosa, stipata, dilatabili, quae externe, in superiori vaginae extremitate, obtegatur peritonaei continuatione, in inferiori vero extremitate fibris muscularibus a leuatoribus ani eiusque sphinctere externo profectis instructa est. Interiorem vaginae ambitum circumuestit membrana rugosa dilatibilis, laxiore cellulosa tunicae modo descriptae annexa, epidermidis continuatione manifeste enata.

Haec igitur, quam diximus, rugosa membrana, ob laxiorem suam cum ipsa vagina nexum, facile relaxatur et prolabitur, adeo, ut, vel tumorem in ipsa vagina efficiat, vel extra labia pudendorum haereat et externe in conspectum veniat. Illud vocamus vaginae relaxationem, siue prolapsum *incompletum*, hoc vero *completum*, qui, si tota vaginae membrana rugosa elabatur, *uniuersalis*, et si aliqua tantummodo eius pars egreditur, *partialis* nobis audit.

Quum autem tota vaginae tunica interna prolabi nequeat, absque vteri ipsius, cui vagina adhaeret, descensu, nec etiam absque vrethrae et ipsius vesicae vrinariae quadam distensione et dislocatione, sequitur, nullum dari vaginae prolapsum *simplicem*, nisi *partialis* sit, et *uniuersalem* procidentiam semper esse *complicatam*.

SIGNA, quibus vaginae prolapsus dignoscitur, ea sunt, ut tactus exploratione tumorem in ipso vaginae pariete, aut vero rugas elongatas et prominentes sentiamus, vteri autem segmentum inferius in situ naturali deprehendamus, si nempe

pe relaxatio vaginae aut prolapsus partialis incompletus et simplex adest. Idem prolapsus, si completus est, tactu et visu facile dignoscitur: prominet enim extra vaginam ruga aut quasi plica cutanea, quae, decumbente femina, sponte retrocedit aut facile reponitur, eadem vero pedibus insistente denuo elabitur et elongatur. In hoc casu, ut et in priori, segmenti uteri inferioris situs non a naturali recedit. Differens vero est ratio prolapsus vaginae completi et vniuersalis, in quo tubus cutaneus, farciminis quasi in modum, e pudendis dependens cernitur. Peruius est hic tubus, sanguini menstruo effluenti viam praebet, et digitum explorantem ad uteri usque segmentum inferius, quod e naturali sede delapsus est, admittit; reponitur etiam absque difficultate, si nimirum non adest tumor inflammatorius, qui quo minus id fieri possit impediat.

Accidit enim, vel sola vestimentorum frictione et irritatione, vel humorum ex quacunque causa affluxu, vel etiam sub partu, si caput infantis in ipsum vaginae prolapsus descendit, ut eius moles mirum in modum crescat. Tum vero non tubum format, sed corpus pyriforme, duriusculum, carni crudae simillimum, ampliori et inferiori in loco perforatum, stylum exploratorium in ipsum suum cauum admittens, et ipsius uteri procidentiam quodammodo referens. Hinc quoque factum est, ut eiusmodi prolapsus vaginae medicis et chirurgis quibusdam ita imposuerit, ut eum pro vera uteri procidentia habuerint, cuius rei exempla nonnulla



in obseruatorum scriptis occurrunt *), quem tamen errorem euitabis, si ad ea signa, quibus vteri procidentia a vaginae prolapsu distinguitur, animum conuertas. In illa nimirum tumor, qui e verendis dependet, superne latior et crassior, inferne autem, vbi perforatus est, tenuior atque angustior deprehenditur, stylusque exploratorius ad latera istius tumoris intra pudendorum labia immissus libere ascendit; in hoc vero, tumor ita dependet, vt eius latior pars inferiora, angustior autem superiora spectet, stylusque exploratorius ad latera ipsius intra pudendorum labia immissus libere non ascendat, sed eam vaginae partem, quae vteri segmento inferiori adhaeret, mox offendat. Nec quoque, si ad ea, quae supra indicauimus, attendas, eiusmodi vaginae prolapsum commutabis cum vteri inuersione, aut polypo, aut sarcomate, peculiaribus suis signis inter se distinguendis, quae singulatim exponere huius loci non est.

Ad causas prolapsus vaginae in genere ea pertinent, quae tunicam internam siue rugosam vaginae relaxare et prolongare eiusque nexum cum ipsa vagina debiliorem reddere valent. Huc igitur referas fluorum album diuturnum et inueteratum; menstruorum profusionem iteratam; ponderis grauioris eleuatio-

*) Vid. IOB. V. MEEKREN, in *obseruat. medico-chirurg.* cap. 54. WIDMANN in *Ephem. Nat. Cur.* Cent. VIII. obs. 98. Fuerunt etiam, qui vaginae prolapsum ingentem cultro resecantes, ipsum vterum se abscidisse putarent, istasque feminas, vtero licet destitutas, concipere et fetum edere nihilominus potuisse affirmarent. Conf. HEISTERI *institut. chirurg.* part. II. sect. V. cap. 158.

tionem et sustentationem; commotiones et nifus corporis vehementiores, quales fiunt saltatione, risu immoderato, lapsu, tussi, vomitu rel.; aerumnosam alui depositionem; titillationem libidinofam digiti immiffione peractam; coitum nimium; abufum balneorum calidorum et remediorum emollientium exteriorum; violentias in difficili partu vel obftetricis manu vel capite infantis praegrandi vaginae illatas; neglectum a partu decubitum et immodicam gressionem: quae vero omnia morbum, de quo nobis fermo est, in iis praecipue feminis producant, quibus peluis ampla est, et quae colluue serofa abundant, corporisque habitu laxo, pituitoso, ad cachexiam prono laborant.

Sed haec haftenus. Superest enim, vt commendemus
Clariff. Medicinae CANDIDATOS

IACOBVM LVDOVICVM GEBHARDT

WETTERAVIENSEM

et

GEORGIVM FRIDERIC. CHRISTIANVM
F V C H S,

IENENSEM

qui quantum in litteras incubuerint, ex ipso eorum vitae curriculo satis iam patet. En igitur vitae historiam ab ipsis Candidatis relata!

Ego, Iacobus Ludouicus GEBHARDTVS *Marienbornae in
praedio Wetteraviensi die XXIIdo Augusti anni MDCCCCLII.
lucem*



lucem primam adspexi. Patrem, Henr. Phil. Lud. GEBHARDTVM, Medicum Fratrum, qui postea Ebersdorffiam se contulit, cum matre Anna Dorothea e gente BEZOLDIANA, omni qua decet pietate, adhuc veneror. Parentes isti carissimi nec neglexerunt educationem, quae spectat ad religionem Christianam, sed etiam ad mores et eruditionem. B. HAGEN, Prof. Baruthensis, praeter ceteras disciplinas, linguam latinam, graecam et gallicam me docuit. Deinde patre optimo duce res pharmaceuticas, et post reditum in patriam morbos primum sanare didici. Cum vero cognitionem meam mactare atque amplificare studerem, lectionibus ordinariis et priuatissimis b. MOLLERI, medici et chirurgi Fratrum, praecipue chirurgicis interfui. Is enim in huius doctrinae theoria et praxi tanto ardore et studio me erudiuit, quanto celebrare satis vix possum; cuius etiam sub auspicio multa peragere mihi licuit. Septem fere annis hic peractis anno CIOIOCCCLXXIV. Tigurum in Heluetia migraui, ubi BVRGHARDTVS, Demonstrator anatomiae et chirurgiae, locum ammanuensis et chirurgici et pharmaceutici mihi demandavit unaque doctrinas, anatomicas, chirurgicas et vinculo- rum applicandorum mihi tradidit, aegrotos nec minus visitare me misit. Vix huius viri probi in me merita collata effari possum. Filius eius BVRGHARDTVS parenti adiunctus artem obstetriciam me docuit. Collegia pathologica, physiologica et materiam medicam apud Ill. RAHNIVM Prof. Med. virum maxime colendum audiui. Cum praesertim mihi licitum erat, anatomiam excolere, in theatro anatomico Tigurensi Professor eligebar, colloquio ibi solito de variis amputationis generibus habito ac peracto. Ceterum in Nosocomiis ibi bene institutis aegros videre et sanare grata permissio data erat. Hinc in patriam re-
dii

dii sed iussu et beneficio Comitis HENRICI XXIVmi tum clementissime regnantis Dresdam petii, ut usum caperem e nosocomiis militum. Quo facto doctrinis medicis et chirurgicis imbutus iterum redii et artem medicam quantum fieri potuit exercui. Denique non possum, quin Clar. SCHRADERVM Med. Doctorem, Consiliarium et Archiatrum domus Comitum Ebersdorfianae publice celebrem, qui me innumeris beneficiis, summa humanitate et consilio optimo in aegrotis sanandis accumulavit benignissime, cuius vitam Deus diu incolumen servet.

Petiit nuperrime ab Ordine nostro summos in arte salutari honores. Ad examina igitur consueta admissus, bene in iis respondit et Ordini nostro ita satisfecit, ut cathedra ei aperiretur, ex qua die x Martii dissertationem suam *historiam osteosteatomatis maxillae feliciter curati*, Praefide Ill. GRVNERO, Collega nostro coniunctissimo, defendit, praemiisque diligentiae ornatus est.

II.

Ego, Georgius Fridericus Christianus FUCHS, natus sum, Anno Domini millesimo septingentesimo sexagesimo, die decimo nono Augusti in hac musarum sede, patre Georgio Augusto Medicinae et Philosophiae doctore, matre Christiana Elisabetha ex stirpe KOCHIANA, uterque iam dudum inter coelites triumphantes. Hi parentes optimi, et post eorum obitum rerum mearum domesticarum tutores, nempe Ioannes Fridericus HIRT, olim antistes circuli Ienensis, nunc antistes superior circuli saxonici, et pro tempore Christianus Fridericus POLZ, Professor Philosophiae Publicus ordinarius, viri omni pietatis cultu a me prosequendi, omnem navarunt operam, ut non solum religionis praeceptis, sed etiam

B

litteris



litteris imbuerer, qua in re domestica institutione usus sum, usque ad annum decimum sextum aetatis meae. Anno Domini millesimo septingentesimo septuagesimo quinto, in numerum civium academicorum a Magnifico t. t. Academiae Prorectore, Summe venerabili DANOVIU receptus sum. Disciplinas logicas et metaphysicas me docuit summe venerandus POLZIVS; venerabilis BLASCHE Professor Theologiae extraordinarius fundamenta styli me docuit; Mathesin puram, Physicam theoreticam experimentalem, Chemiam theoretico-experimentalem et historiam naturalem Illustrem SVCCOVIVM explicantem audiui. Interfui etiam praelectionibus b. WALCHII in historiam naturalem. In Mathesi applicata et Cosmologia Illustris WIEDEBURG me erudiuit. Disciplinas historicas SCHMIDT b. m. et vir Excellentissimus MVELLER, quem etiam antiquitates germanicas et Bibliothecae academicae memoratu digna explicantem audiui, me docuerunt. In anatomia b. NEUBAVERVS et Vir Experientissimus SCHENKE me erudierunt, cuius praelectionibus osteologicis et botanicis etiam interfui. Physiologiam me docuerunt, vir Illustris NICOLAI Facultatis Medicae Senior, cuius Exercitationibus disputatoriis etiam interfui, et Vir Excellentissimus STARCKE. Pathologiam, Semioticen, Therapiam generalem et specialem, materiam medicam, Dieteticam, historiam medicinae litterariam, methodum formulas medicas conscribendi me docuit Vir Illustris GRVNER Dissertationis Praeses, cuius praelectionibus in Hippocratem et Celsum etiam interfui. Virum Excellentissimum STARCKIVM Pharmaciam, materiam medicam, artem obstetriciam et morbos biblicos explicantem audiui. Denique etiam minime intermisi, ut lingua gallica, anglica et italica imbuerer. Peracto studiorum cursu
anno



*anno millesimo septingentesimo et octagesimo Berolinum me contuli, ubi Illustrem GLEDITSCH botanicam medicam docentem audiui, et Viri Excellentissimi WALTERI praelectionibus artis obstetricandi, viri Excellentissimi ACHARDI praelectionibus chemiae experimentalis, Viri Excellentissimi VOITI et Viri Experientissimi GOENNERI praelectionibus chirurgicis interfui. Ut vero etiam theoriam artis obstetricandi ad praxin applicarem, omnem moui lapidem, in Nosocomio regio Berolinensi, quo etiam sub viro-
rum excellentissimorum SELLII et VOITI adminiculo praxi medicae me dedi. Peraeto dimidio anni spatio me ad hanc musarum sedem contuli et a Gratijsa Facultate Medica petii, ut summorum honorum in arte medica me redderet participem.*

Meis etiam sedulus interfuit lectionibus anatomicis et chirurgicis, meisque sub auspiciis cadauera humana dissecuit.

Hisce itaque variis scientiis, quae ingenium excolerent, egregie instructus Candidatus doctissimus ita sese exhibuit Facultati nostrae, ut communi suffragio ornaretur, ipsique aditus ad summos honores medicos aperiretur. Defendit igitur die XII Maii doctam suam dissertationem de *febre puerperarum* sub praesidio Ill. GRVNERI, Collegae nostri coniunctissimi, quo facto summi in arte salutaris honores ipsi conferentur.

Cui igitur solemnitati ut MAGNIFICVS ACADEMIAE PRORECTOR, I. R. I. COMES ILLVSTRISSIMVS, PATRES ACADEMIAE CONSCRIPTI, VTRIVSQUE REIPVBLICAE
PRO-



PROCERES, COMMILITONES GENEROSISSIMI ATQUE
PRAENOBILISSIMI, ET SI QVI SUPERSVNT MV SARVM FAV-
TORES beneuole adsint, ordinis mei nomine oro rogoque.

P. P. sub Sigillo Facultatis medicae. Ienae d. x Maii

MDCCCLXXXI.

